

中华
禅藏

点校本

五灯会元

绍述祖师法脉传承

证道机缘

直示当体

了达顿悟

【下】

宋普济
朱俊红
点校

海南出版社

五灯会元

【下】

宋普济辑
朱俊红点校

中华书局
出版

《五灯会元》卷第十四

青原下七世

洞山延禅师法嗣

瑞州上蓝院庆禅师

初游方,问雪峰:“如何是雪峰的的意?”峰以杖子敲师头,师应诺,峰大笑。师后承洞山印解,开法上蓝。

僧问:“如何是上蓝无刃剑?”师曰:“无。”曰:“为甚么无?”师曰:“阇黎,诸方自有。”

洪州同安慧敏禅师

初参洞山,问:“诸圣以何为命?”山曰:“以不间断。”师曰:“还有向上事也无?”山曰:“有。”师曰:“如何是向上事?”山曰:“不从间断。”师于言下有省。

住后,僧问:“请师一句。”师曰:“好记取。”

金峰志禅师法嗣

庐山天池智隆禅师

在金峰普请般柴次，峰问：“般柴人过水否？”师曰：“有一人不过水。”曰：“不过水还般柴否？”师曰：“虽不般柴，也不得动着他。”

鹿门真禅师法嗣

襄州谷隐智静悟空禅师

僧问：“如何是和尚转身处？”师曰：“卧单子下。”

问：“如何是道？”师曰：“凤林关。”曰：“学人不会。”师曰：“直至荆南。”

问：“如何是指归之路？”师曰：“莫用伊。”曰：“还使学人到也无？”师曰：“甚么处着得汝？”

问：“灵山一会，何异今时？”师曰：“不异如今。”曰：“不异底事作么生？”师曰：“如来密旨，迦叶不闻。”

问：“古涧寒泉，甚么人得饮？”师曰：“绝饥渴者。”曰：

“绝饥渴者如何得饮？”师曰：“东畎^①东流，西畎西流。”

益州崇真禅师

僧问：“如何是禅？”师曰：“澄潭钓玉兔。”曰：“如何是道？”师曰：“拍手笑清风。”

问：“如何是大人相？”师曰：“泥捏三官土地堂。”

襄州鹿门志行谭禅师

僧问：“如何是实际理地？”师曰：“南瞻部洲，北郁单越。”曰：“恁么则事同一家也。”师曰：“隔须弥在。”

问：“远远投师，请师一接。”师曰：“从甚么处来？”曰：“江北来。”师曰：“南堂里安下。”

问：“如何是清净法身？”师曰：“戊亥年生。”

庐山佛手岩行因禅师

雁门人也。首谒鹿门，师资契会。寻抵庐山。山之北，有岩如五指，下有石窟，可三丈余，师宴处其中，因号

① 畎：音犬。田地中间的沟。

五灯会元

“佛手岩和尚”。江南李主三召不起，坚请就栖贤。开堂不逾月，潜归岩室。

僧问：“如何是对现色身？”师竖一指。

法眼别云：“还有也未？”

后示微疾，谓侍僧曰：“日午吾去矣。”及期，僧报：“日午也。”师下床，行数步，屹然立化。李主备香薪，茶毗，塔于岩之阴。

曹山霞禅师法嗣

嘉州东汀和尚

僧问：“如何是向去底人？”师曰：“石女纺麻缕。”曰：“如何是却来底人？”师曰：“扇车关楔断。”

问：“遍界是佛身，教某甲甚么处立？”师曰：“孤峰顶上木人叫，红焰辉中石马嘶。”

草庵义禅师法嗣

泉州龟洋慧忠禅师

本州陈氏子。谒草庵，庵问：“何方来？”师曰：“六眸峰。”庵曰：“还见六眸否？”师曰：“患非重瞳。”庵然之。师

寻回故山。属唐武宗废教，例民其衣。暨宣宗中兴，师曰：“古人有言：上升道士不受篆，成佛沙弥不具戒。”只为白衣，过中不食，不字而禅，迹不出山者三十年。

述三偈以自见曰：

雪后始知松柏操，云收方见济河分。不因世主教还俗，那辨鸡群与鹤群。

多年尘事漫腾腾，虽着方袍未是僧。今日修行依善慧，满头留发候然灯。

形仪虽变道常存，混俗心源亦不昏。试读善财巡礼偈，当时岂例作沙门。

谓门弟子曰：“众生不能解脱者，情累尔。悟道易，明道难。”僧问：“如何得明道去？”师曰：“但脱情见，其道自明矣。夫明之为言，信也。如禁蛇人，信其咒力药力，以蛇缩弄揣怀袖中无难；未知咒药等力者，怖骇弃去。但谛见自心，情见便破。今千疑万虑不得用者，未见自心者也。”忽索香焚罢，安然而化，全身葬于无了禅师塔之东。后数年，塔忽坼裂，连阶丈余。主僧将发视之，是夜宴寂中见无了曰：“不必更发也。”今为沈、陈二真身。无了姓沈，见马祖。

同安丕禅师法嗣

洪州同安志禅师

先同安将示寂，上堂曰：“多子塔前宗子秀，五老峰前

五灯会元

事若何？”如是三举，未有对者。末后师出曰：“夜明帘外排班立，万里歌谣道太平。”安曰：“须是这驴汉始得。”

住后，僧问：“二机不到处，如何举唱？”师曰：“遍处不逢，玄中不失。”

问：“凡有言句，尽落今时。学人上来，请师直指。”师曰：“目前不现，句后不迷。”曰：“向上事如何？”师曰：“迥然不换，标的即乖。”

袁州仰山和尚

僧问：“如何是仰山境？”师曰：“白云峰下猿啼早，碧嶂岩前虎起迟。”僧曰：“如何是境中人？”师曰：“寒来火畔坐，热向涧边行。”

归宗恽禅师法嗣

庐山归宗弘章禅师

僧问：“学人有疑时如何？”师曰：“疑来多少时也？”

问：“小船渡大海时如何？”师曰：“较些子。”曰：“如何得渡？”师曰：“不过来。”

问：“枯木生华时如何？”师曰：“把一朵来。”

问：“混然觅不得时如何？”师曰：“是甚么？”

嵇山章禅师法嗣

随州双泉山道虔禅师

僧问：“洪钟未击时如何？”师曰：“绝音响。”曰：“击后如何？”师曰：“绝音响。”

问：“如何是在道底人？”师曰：“无异念。”

问：“如何是希有底事？”师曰：“白莲华向半天开。”

云居岳禅师法嗣

杨^①州丰化院令崇禅师

舒州人也。僧问：“如何是敌国一着棋？”师曰：“下将来。”

问：“一棒打破虚空时如何？”师曰：“把将一片来看。”

① 杨：同“扬”。

澧州药山忠彦禅师

僧问：“教中道‘诸佛放光明，助发实相义’。光明即不问，如何是实相义？”师曰：“会么？”曰：“莫便是否？”师曰：“是甚么？”

问：“师唱谁家曲，宗风嗣阿谁？”师曰：“云岭龙昌月，神风洞上泉。”

梓州龙泉和尚

僧问：“如何是祖师西来意？”师曰：“不在阇黎分上。”

问：“学人欲跳万丈洪崖时如何？”师曰：“扑杀。”

护国澄禅师法嗣

随州护国知远演化禅师

僧问：“举子入门时如何？”师曰：“缘情体物事作么生？”

问：“乾坤休驻意，宇宙不留心时如何？”师曰：“总是战争收拾得，却因歌舞破除休。”

随州智门寺守钦圆照禅师

僧问：“两镜相照，为甚么中间无像？”师曰：“自己亦须隐。”曰：“镜破台亡时如何？”师竖起拳。

问：“如何是和尚家风？”师曰：“额上不贴榜。”

问：“如何是祖师西来意？”师曰：“把火烧天徒自疲。”

安州大安山崇教能禅师

僧问：“师唱谁家曲，宗风嗣阿谁？”师曰：“打动南山鼓，唱起北山歌。”

问：“如何是三冬境？”师曰：“千山添翠色，万树锁银华。”

颖州荐福院思禅师

僧问：“古殿无佛时如何？”师曰：“梵音何来？”曰：“不假修证，如何得成？”师曰：“修证即不成。”

随州护国志朗圆明禅师

僧问：“如何是万法之源？”师曰：“空中收不得，护国岂能该。”

灵泉仁禅师法嗣

郢州大阳慧坚禅师

初在灵泉，入室次，泉问：“甚么处来？”师曰：“僧堂里来。”泉曰：“为甚么不筑着露柱？”师于言下有省。

住后，僧问：“如何是玄旨？”师曰：“壁上挂钱财。”

问：“如何是法王剑？”师曰：“脑后看。”

问：“如何是无相道场？”师曰：“佛殿里悬幡。”

问：“不借时机用，如何话祖宗？”师曰：“老鼠咬腰带。”

僧请益法身，师示偈曰：“扶桑出日头，黄河辊底流。六六三十六，陕府灌铁牛。”

五峰遇禅师法嗣

瑞州五峰绍禅师

僧问：“如何是第一义？”师拍禅床云：“若不是仙陀，千里万里。”

问：“如何是祖师西来意？”师曰：“迢迢十万余。”

广德延禅师法嗣

襄州广德义禅师

谒先广德，作礼问曰：“如何是和尚密密处？”德曰：“隐身不必须岩谷，阡陌堆堆睹者稀。”师曰：“恁么则酌水献华去也。”德曰：“忽然云雾霭，阍黎作么生？”师曰：“采汲不虚施。”广德忻然曰：“大众，看取第二代广德。”师次踵住持，聚徒开法。

僧问：“如何是佛？”师曰：“披蓑倒骑牛，草深不露角。”

问：“如何是祖师西来意？”师曰：“鱼跃无源水，莺啼枯木花。”

问：“如何是常在底人？”师曰：“腊月死蛇当大路，触着伤人不奈何。”

问：“如何是学人相契处？”师曰：“方木逗圆孔。”

问：“如何是大寂灭海？”师曰：“闹市走马，不触一人。”曰：“如何是大通智胜佛？”师曰：“孤轮罢照妙峰顶，汝报巴猿莫断肠。”

问：“如何是作无间业底人？”师曰：“猛火然铛煮佛喋。”

师因事示偈曰：“才到洪山便踩根，四方八面不言论。他家自有眠云志，芦管横吹宇宙喧。”

问：“如何是古佛心？”师曰：“多年历日虽无用，犯着应须总灭门。”曰：“或遇新历日又作么生？”师曰：“运动修营无滞碍，何劳入市问孙臆。”

问：“时人有病医王医，医王有病甚人医？”师展手曰：“与我诊候看。”曰：“不会。”师曰：“须弥徒作药，四海漫为汤。”

问：“向上一路，千圣不传。和尚还传也无？”师曰：“铁丸蓦口塞，难得解吞人。”

问：“如何是佛法大意？”师曰：“雪寒向火，日暖隈阳。”

问：“如何是宾中宾？”师曰：“荡子无家计，飘蓬不自知。”曰：“如何是宾中主？”师曰：“茅户挂珠帘。”曰：“如何是主中宾？”师曰：“龙楼铺草坐。”曰：“如何是主中主？”师曰：“东宫虽至嫡，不面圣尧颜。”

问：“有一室女，未曾嫁娉，生得一子，姓个甚么？”师曰：“偶然衫子破，阌外没人缝。”

问：“如何是不落阶级底人？”师曰：“胎中童子眉如雪。”

问：“如何是不睡底眼？”师曰：“昨夜三更擘不开。”

问：“谛信底人信个甚么？”师曰：“莫道冰无火，斯须红焰生。”

问：“如何是密室？”师曰：“茅茨当大道，历劫没人敲。”

问：“如何是异日已前人？”师曰：“万年枯木鸟衔来。”

问：“悬崖峭峻，还具得失也无？”师曰：“忻逢良便，好与一推。”

五灯会元

问：“牛头未见四祖时如何？”师曰：“鲜瓮乍开蝇哧哧^①。”曰：“见后如何？”师曰：“底穿荡尽冷湫湫。”

襄州广德周禅师

僧问：“鱼向深潭难避网，龙居浅水却难寻时如何？”师曰：“遍体昆仑黑，通身一点霜。”

问：“贫子归家时如何？”师曰：“入门不见面，处处故园春。”

问：“命尽禄绝时如何？”师曰：“死。”曰：“此人落归何道？”师曰：“薰薰弥宇宙，烂坏莫能拈。”

问：“闻话不觉时如何？”师曰：“遍界没聋人，谁是知音者。”曰：“如何是知音者？”师曰：“断弦续不得，历劫响泠泠。”

问：“教中道‘阿逸多不断烦恼，不修禅定，佛记此人成佛无疑’。此理如何？”师曰：“盐又尽，炭又无。”曰：“盐尽炭无时如何？”师曰：“愁人莫向愁人说，说向愁人愁杀人。”

问：“如何得念念相应去？”师曰：“惊水鱼龙散。”曰：

① 哧：音义同“啞”。

“念念相应后如何？”师曰：“海北天南各自行，不劳鱼雁通消息。”

石门蕴禅师法嗣

襄州石门慧彻禅师

僧问：“金乌出海光天地，与此光阴事若何？”师曰：“龙出洞兮风雨至，海岳倾时日月明。”

问：“从上诸圣向甚么处去也？”师曰：“露柱挂灯笼。”

问：“如何是和尚家风？”师曰：“解接无根树，能挑海底灯。”

问：“如何是祖师西来意？”师曰：“少林澄九鼎，浪动百花新。”

问：“如何是佛法大意？”师曰：“三门外松树子，见生见长。”

问：“三身中那身是正？”师曰：“报化路头横鸟道，石人眼里不栽花。”

问：“云光作牛，意旨如何？”师曰：“陋巷不骑金色马，回途却着破襦衫。”